

24  
25.

DECANI ET SENIORIS  
COLLEGII MEDICI  
RVDOFFI VVILHELMI  
CRAVSII,  
PHIL. ET MED. DOCT.  
PRAX. ET CHIM. PROF. PVBL.

*Propempticum Inaugurale*  
DE EFFICACI INFLVXV ASTRORVM  
IN CORPVS HVMANVM.

---

J. E. N. Æ,

Literis KREBSIANIS.





**V**nde *alterationum & mutationum* aëtheris & aëris, tantus, quantum in corporibus exerunt, *Symbolismus* proveniat, hactenus inquisivimus, & invenimus eum ab aëtheris & aëris interni vitalis, in spiritibus & humoribus reperiundis, cum aëtheris & aëris externi identitate optimè deduci posse, sic, ut, cum coelestia agunt in aetherem, & hic in aërem, hi ambo conjunctim in spiritus & humores corporis nostri agant, sintque adeo aether & aer *interpretes communes inter spiritus, humores, nostros, & astralem alterationem.*

Probant hunc symbolismum *deliria*, quæ sanguinis & spirituum humani corporis motum aëris vicissitudinibus obnoxium esse satis manifestè probant; confirmat id *Epilepsia*, ordinariè circa novilunium in dispositis, interdum etiam ad singulas Lunæ quadras recurrens. Sic *Carolus Piso* procellosis imminetibus tempestatibus *hystericarum* paroxysmos exacerbari annotavit. In morbis *serosis*, si non inferendis, tamen disponendis & exacerbandis magnam habere vim astrorum influxus, medici omnes norunt, sic, ut *artbriditem* in iis, qui gravius aliàs hoc morbo afficiuntur, plerumque *circa solstitia* redire, nemo inficietur. Et hæc omnia ex *aetheris & aëris* varia alteratione, mutatione & vicissitudine optimè deduci possunt, utpote qui corpora humana ambiendo, & se intrò recipiendo, porosque subeundo, præterea respiratione ad ipsos pulmones delati, partim propter varia sua contenta, miasmata & effluvia,

para



partim propter motum ab astris aetheri, & ab hoc, ac vento aëri impressum, spiritus & humores, atque hinc totum corpus, pro variâ sua constitutione & qualitate variè afficere, mutare, & lædere possunt.

Hinc *Veris* tempore, ubi sanguis commotus proprio quasi nisu se defæcare & ad peripheriam corporis pravos humores, in dispositis ad efflorescentias cutaneas, protrudere solet, illi, qui pravis humoribus pleni sunt, in variolas, scabiem, varos, aliaque mala similia incidere solent. *Aestatis* tempore, quando radii solares verticem nostrum fortius petunt, & atmosphæra multis effluviis sulphureis, seu igneis copiosis scatet, quæ particulas oleosas sanguinis rarefaciunt, exaltant, & ebullire faciunt, salinas aciunt, biliosas in motum rapidiorem cient, & magis elasticas reddunt, adque caput alliciunt, febribus gravissimis, ardentibus, malignis, spirituum turbulentis & deliriis fores apperiri solent amplissima.

Quando *Hippocrates* 3. *aph.* 20. & 22. *vere & autumno insanias* evenire asserit, quid aliud, quæso, indicat, quàm *aetheris mutationes* ad excitandos morbos, & speciatim *maniam* in dispositis conferre. Quis nescit circa *dies caniculares*, ubi poros magis apertos *serum*, quò aliàs particulae salino *Ære* sanguinis diluuntur & temperantur, largius transpirant, sanguisque quasi incoquitur & fervidior redditur, atque hinc spiritus magis sulphurei, volatiles & feroces evadunt, *manias*, aliaque gravissima *deliria* oriri.

Si *frigidior* aër temporibus anni comitatus in excessu peccat, sicque spiritus in muniis suis exsequendis turbantur, & sæpè ex improvise, inprimis quando mutatio aëris à calidiori & sicciori in frigidiorē & humidiorē, ac vice versa subito contingit, adeoque insensibilis transpiratio nimium turbatur, interceptur vel alteratur, planè obruuntur, quid aliud ex hisce causis, quàm humorum stagnatio, corruptio, gravissimaque spirituum



læſio oriri, & hinc *febres, vertigines, convulſiones*; aliaque incommoda, & maxima mala corpori induci poſſunt.

Quod *Auſtrinas* conſtitutiones corpora *humectare*, & morborum feraciſſimas eſſe *Hippocrates 3. aph. 5.* ait, id quotidiana experientia ſatis confirmat. Quod enim aër humidus non ſolùm externas, & immediatè ſub cute poſitas partes, eas humectando afficiat, ſed tranſeat quoque, ſe inſinuando ulterius in ipſa interiora, id teſtantur inter alia laſſitudines, deſluxiones, & catarrhi ferociſſimi; nemoque forſan, tam perfectæ ſanitatis invenietur, qui imbris diutius continuantibus non vexetur jam recensitis, & aliis à ſero & humiditate oriundis ſymptomatibus.

*Nebuloſum & nubioloſum* aërem varia in corporibus humanis mala producere & excitare, nemo forſan inficiabitur; obſervamus enim toto die, dum atmophæra craſſis & gravibus ejusmodi exhalationibus referta eſt, ut & *ante nivis deſcenſum*, premi organa reſpirationis, & quia ſanguis tunc, ob admixtas iſtas craſſiores particulas, circulationi cordis minus auſcultat, *aſthmaticos* tunc difficillimè ſpirare, & peſſimè ſe habere.

Nec *venti* omni noxa carent; Quod enim aër etiam morbiſicus exiſtere poſſit ratione motus nimii, à ventis impetuoſis impreſſi, teſtantur *catarrhi*, quibus ob commotos à ventis humores anſa ſubminiſtratur. Imò dum ipſorum vehementiâ aër, imprimis frigidus, aut aliàs pravus poris cutis altius impellitur, eoſque nimium conſtringit, & coarctat, ſicque tranſpirationem ſufflaminat, ſudoremque coërcet, ita dum venenolis, aliisque noxiis effluviis refertus eſt aër à vento agitatus, & impetuoſè in os, nares, aures, pulmones, ut & in oſcula vaſorum ad ſuperficiem corporis exporrectorum incuneatur, innumera & ſæviſſima mala oriri omnes norunt medici, & proinde non immeritò etiam hoc nomine aërem in morborum præcautione & curatione attendunt.



Ex hæcenus recensitis patescit, quàm variè aër in corpora humana agere, eaque afficere, alterare & lædere possit. Quid igitur mirum? quod *valetudinarii*, qui jam dum labili nimis utuntur sanitate, aëris mutationes tam exactè sentiant, ita, ut vix Barometrum futuras aëris mutationes, tempestates, pluvias, tonitrua, imò ipsam quoque cæli serenitatem imminuentem tam exquisito ac accurato ostendat indice, quàm quædam subjecta humana, quæ nunc insuetâ anxietate, lypothymiis, capitis dolore, vertigine, vomitu, diarrhæis, sternutationibus, pruritu cutis & artuum, punctationibus ac lancinationibus hinc inde in diversis corporis partibus, aliisque pluribus symptomatibus vexantur, donec illa adverla aëris qualitas in meliorem permutata fuerit.

Quod autem illi maximè aëris mutationes persentiant, qui *vulnera* aliquando cruenta, *contusiones*, *fracturas* & similia perpeffi sunt, & licet omnibus ritè consolidatis sani & robusti videantur, nihilominus immanes lamententur cruciatus imminentibus aëris notabilioribus mutationibus, caussa haud malè à medicis in *consolidatione* solutionum istarum tam contigui quam continui quæritur. Cum nempe in dictis unitatis solutionibus nunquam tam accurata dislocatarum in partibus fibrarum, vasorum, & tubulorum collocatio & adaptatio iterum fieri à chirurgis & natura possit, sed tubuli & vasa carni internum vel coarctata relinquantur, & angustata, interdum planè occludantur, &c. hinc facile colligere possumus, humoribus, & ipsorum circulatione ab ætheris & aëris variâ constitutione in qualitate & motu variatis, tubulos illos vel planè ad permittendos, vel ad debite transmittendos spiritus & sanguinem ineptiores reddi, sicque stagnatione suâ dolori, pruritu aliisque malis ansam dare posse.

Sed abrumpendum esse jubet brevitatis nimia temporis concessi, qua propter properamus, exposituri curriculum vitæ & studiorum Candidati medicinæ clarissimi & dignissimi



# ARNOLDI FRIDERICI BEIERI.

Natus est in hoc Musarum celebri Emporio Anno MDCLXXIII. d. XIV. Martii. Patre, Viro Nobilissimo Excellentissimo & Consultissimo D. ADRIANO BEIERO, tunc Illustris Regiminis Aulici & Curiae Provincialis Advocato, hodiè Professore Institutionum publico Ordinario, Facultatis Juridicae & scabinatus Assessore, Collega & Compatri nostro pl. honorando. Matre, DOROTHEA SABINA, JOHANNIS MAVRITII FRIDERICI, Serenissimo Duci FRIDERICO WILHELMO quondam in Aula Altenburgerensi à secretis b. m. filia. Horum cura in fidei Christianae & bonarum literarum fundamentis, quam primum infantilis admittebat aetas, egregie profecit. Cumque & ingenium bonum & inclinationem ad studia ex Parentum voto ostenderet, scholae oppidanæ juxta & domesticis concreditus Praeceptoribus, imperata horum facile admisit, & expectationi Parentum ita respondit, ut cum ipsa adolescentia ablegandus aliò videretur.

Hilarior fama de praeclara eruditione & singulari docendi dexteritate M. JOH. TÖPFER, facile pellexit eum, ut Numburgum concederet, scholamque Senatoriam eò usque frequentaret, donec ab illo ipso Praeceptore studiis Academicis idoneus haberetur.

Adpulit igitur ad academiam Patriam vernante Anno octuagesimo nono, sceptrā tenente JOH. ANDR. SCHMIDIO, tum Logices & Philosophiae primae, hodiè S. S. Theol. D. & in Incluta Academia Julia Professore, ut celebratissimo, ita meritissimo: Qui & in matriculam studiosorum recepit, & Scholis mathematicis physicisque curiosis, quod debita cum gratia.



tiarum actione agnoscit, & publice commemorari petiit, interesse per triennium penè permisit.

Licet autem recordatio Avunculi quondam sui, Nobilissimi IOH. ARNOLDI FRIDERICI, Phil. & M. D. ac P. P. in hac Academia b. m. excellentissimi fomes ipsi ad studium Medicum erat, regia tamen via per philosophicos tramites ad istud progredi constituit, sectatus primò philosophiæ doctores excellentissimos, JOH. PAUL. HEBENSTREIT, in Logicis, tam privatim, quàm publicè viam ipsi monstrantem; Postmodum Venerabilis senis, DN. CASPARIS POSNERI, Phys. P. P. vestigia legit, qui eum ad confinia Medicæ Artis felicissimè deduxit.

Delatus isthuc Præceptores nactus ut nobilissimos & Excellentissimos, ita fidelissimos, GEORG. WOLFG. WEDELIVM, Med. D. Com. Palat. Cæs. Prof. publ. famigeratissimum, & Consiliarium ac archiatrum Saxonicum, ex cujus publicis privatisque lectionibus, juxta cum veris solidisque fundamentis insignem artis ipsius peritiam hausisse lætus gratusque commemorat. D. GÜNTHER. CHRISTOPH. SCHELHAMMERI, & D. JOH. HADR. SLEVOGTII, Anatomix, Chirurgiæ & Botanices per successionem Professorum excellentissimorum, quorum prælectiones cathedrarios, demonstrationes in Cadaveribus tam hominum, quàm brutorum anatomicas, excursiones item botanicas cum præclaro studiorum, suorum emolumento frequentasse gratulatur sibi, illis verò gratias agit quam maximas. Nec dememinit, licet beatè defuncti D. JAC. WOLFFII Professoris paulo antè Extraordinarii, quem Institutiones Mœbianas & rem Botanicam auscultavit explicantem. Mea quoque ope privatim usus est.

Transacto sicdomi quiquenniò, alio etiam sole calescentes invisere placuit terras, superiori anno nonagesimo quartò Hamburgum hinc abiit, inde ad Varniacam Academiam delatus, Hospitio Nobiliss. & Excellentissimi BERNH. BARNSTOR-





1, Med. D. & P. P. Urbisque Physici, ut dexterrimi Præceptoris, etiamnum cum veneratione commemorandi, nec non D. SCHAPERI, P. P. & Archiatri ducalis Meklenburgici conversatione per annum usus integrum.

Delato interim ad Athenas Cimbricas nostrò SCHELHAMMERO, Kiloniam abiit, pristinae informationi insistens. Revocatus autem à Parentibus mense Septembri, Anno 1695. redux usque huc adhæsit nobis, donec ex voluntate Parentis præmia studiorum prensare constituit. Quæ nuper à Facultate nostrâ modestè petiit.

In numerum Candidatorum receptus, in examini us ad votum respondit. Quare cum ad diem XX. Decembr. habiturus sit sub præsidio SCHLEVOGTIANO disputationem inauguralem, DE LOCHIIS CVM DOLORE RETENTIS, Magnificum Rectorem, Academiae proceres & Professores, omniumque ordinum hospites, & Medicæ artis fautores honoratissimos, per officiosæ Collegii nomine invito. Jenæ d. XX. Decembr. Anno M DC XCVII,

